

**Aalisarneq pillugu Inatsisartut Inatsisaata  
allanngortinneqarneranik Inatsisartut inatsisaat  
(Sinerissamut qanittumi aalisarnerup aamma  
avataasiorluni aalisarnerup akornanni pisassiissutit  
agguarneqarnerat, nalunaarutinik innuttaasunut  
aalajangersimasunut ataatsimoortunut  
sammitinneqartunik nalunaaruteqartarneq  
saqqummiussisarnerlu pillugit malittarisassat aamma  
tunitsivinnik nioqqutissiorfinnillu nutaanik  
pilersitsinermi Naalakkersuisut  
akuersissuteqartarnissaannik piumasaqaat)**

**§ 1.**

Aalisarneq pillugu Inatsisartut inatsisaanni nr. 18, 31. oktober 1996-imeersumi kingullermillu Inatsisartut inatsisaatigut nr. 15-ikkut 12. november 2001-imeersukkut allanngortinneqartumi makku allanngortinneqarput:

**1. § 5-imi imm. 3-tutilanngunneqassaaq:**

"Imm. 3. Kalaallit Nunaata Kitaani raajanut TAC -ip agguanneqarnerani sinerissamut qanittumi aalisariutinut 43 %-i avataasiortunullu 57 % tunniunneqartassaaq."

**2. § 10-mi nr. 5 atorunnaarsinneqarpoq.**

Tamatuma kingorna nr. 6 nr. 5-inngorpoq nr. 7-ilu nr. 6-inngorluni.

**3. § 10-p kingornagut paragraffitut nutaatut ilanngunneqassaaq:**

"§ 10a. Aalisakkat erseqqinnerusumik nalunaarsorneqarsimasut aalisarneqarsinnaanerannut aamma aalisarnerup ingerlanneqarnissaanut atugassarititat pillugit Naalakkersuisut malittarisassiorsinnaapput.

Imm. 2. Aalisarnerup ingerlanneqarnissaanut atugassarititani allanngortitsinernik piffissanut killilikkanik taamatullu aamma aalisarnerup qaqugu aallartinneqarsinnaanerani unitsinneqarnissaanillu Naalakkersuisut nalunaaruteqarsinnaapput.

Imm. 3. Imm. 2 malillugu nalunaarutit imm. 1 tunngavigalugu malittarisassiat naapertorlugit nalunaarutigineqarlutillu atorussanngortinneqartassapput. Nalunaarutit Nalunaarutit-Grønlands Lovsamlingimi saqqummiunneqartassanngillat."

4. § 22-p kingorna paragraffittut nutaatut ilanngunneqassaaq:

" § 22a. Tunitsiviit nioqqutissiorfillu nutaat Naalakkersuisut akuersissuteqarsimatinnaq pilersinneqassanngillat. Tamanna aamma atuuppoq nioqqutissiorfiup pioreersup tunitsivittut allanngortiterneqarnissaa imaluunniit aalisakkanik allanik nioqqutissiorfinngortinneqarnissaa kissaatigineqarpat.

*Imm. 2.* Imm. 1-mi aalajangersagaq namminersortut pisortalluunniit suliffeqarfutaasa tunisassiorfinnik pioreersunik matuneqartunik tigusinissaannut akornusersuutitut atorneqaqqusaanngilaq. Tamanna aamma atuuppoq tigusinermut atatillugu tunisassiorneq allanngortinniarneqaraangat.

*Imm. 3.* Naalakkersuisut akuersissuteqarnerannut atatillugu susasaqartut tamarmik tusarniaavigineqartassapput.

*Imm. 4.* Naalakkersuisut tunitsivinnik aamma nioqqutissiorfinnik nutaanik pilersitsineq kiisalu nioqqutissiorfiit pioreersut allanngortinneqarneri pillugit erseqqinnerusunik malittarisassiorsinnaapput."

5. § 32 ima oqaasertaqassaaq:

" § 32. Naalakkersuisut Aalisarneq pillugu Siunnersuisoqatigiinnik pilersitsissapput aalisarnermi soqutigisaqatigiiffinnit ilaasortaaffigineqartumik.

*Imm. 2.* Naalakkersuisut Aalisarneq pillugu Siunnersuisoqatigiit kikkunnik inutta-qartinneqassanersoq aammalu qassinik ilaasortaqaassanersoq peqqussusiutissavaat.

*Imm. 3.* Naalakkersuisut suliassani nalinginnaasuni §§ 5, 7, 9, 10, 11, 13, 18, 20, 22 aamma 23-mut tunngasuni Aalisarneq pillugu Siunnersuisoqatigiit tusarniaavigisassavaat.

*Imm. 4.* Apeqqutini imm. 3-mut ilaatinneqartuni kinguartinneqarsinnaanngitsuni Aalisarneq pillugu Siunnersuisoqatigiinni ilaasortanik tamanik allakkatigut Naalakkersuisut tusarniaatitsisinnaapput. Allakkatigut tusarniaaneq atorneqartassaaq siunnersuisoqatigiit isummerniarlutik ataatsimiissinnaanngikkaangata."

## § 2.

Inatsisartut inatsisaat ulloq 1. juni 2002 atuutilerpoq.

*Namminersornerullutik Oqartussat, ulloq 21. maj 2002.*

Jonathan Motzfeldt

/

Hans Enoksen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut